

每週經課朗誦經文（巴克禮台語漢字）2012/06/03

共同經課-1 以賽亞書六章一節～八節

1 當烏西亞王死彼年，我看見主坐佇高高的寶座。伊的衣服垂落滿殿。2 佇伊的頂面有西拉兵跟隨啲倚，各有六個翅：用二個翅遮面，二個翅遮腳，二個翅啲飛；3 此個唱彼個和講：聖哉！聖哉！聖哉！萬軍的耶和華；伊的榮光充滿全地！4 門框因為唱和的聲來振動，殿就有煙雲滿滿。5 彼時我講：「我有災禍啊！我滅無啦！因為我是嘴唇無清氣的人，閣跼佇嘴唇無清氣的百姓中，因為我目矙有看見王——萬軍的耶和華。」6 有一個西拉兵飛來倚我，伊的手提熱熱的炭，是用火鉗對壇頂提來的。7 將炭下佇我的嘴，講：「看啊，此個下佇你的嘴唇，你的罪過就除去，你的罪惡就赦免。」8 我閣聽見主的聲講：「我通差是誰啊？是誰欲為阮去？」我就講：「我佇遮，通差我！」

共同經課-2 詩篇二十九篇

1 〔大衛的詩〕大權能者的子啊，恁著將榮光、氣力歸互耶和華，歸互耶和華！2 著將耶和華的名所應該得著的榮光歸互伊，用聖潔的妝飾敬拜耶和華。3 耶和華的聲佇水面；榮光的上帝起雷，耶和華佇多多水的頂面。4 耶和華的聲有大氣力；耶和華的聲滿滿威嚴。5 耶和華的聲拍折柏香樹；耶和華拍碎黎巴嫩的柏香樹。6 伊亦互伊越跳親像牛仔，互黎巴嫩及西連越跳親像野牛的子。7 耶和華的聲互火焰分叉。8 耶和華的聲振動曠野；耶和華振動加低斯的曠野。9 耶和華的聲互鹿母驚著來生子，亦互樹林的樹葉落光光。見若佇殿內者，攏講榮光。10 大水氾濫的時，耶和華坐啲做王；耶和華坐啲做王，直到永遠。11 耶和華欲賞賜氣力互伊的百姓；耶和華欲用平安賜福伊的百姓。

共同經課-3 羅馬書八章十二節～十七節

12 按呢，兄弟啊，咱姆是欠肉體的債致到照肉體來活。13 因為恁若照肉體來活，就會死；若用神拍死身軀的所做，就會活。14 凡若互上帝的神所導的，是做上帝的子。15 因為恁姆是受著奴僕的神，致到閣驚惶；就是受著設立做子的神，對按呢咱叫講：「阿爸！父啊！」16 聖神家己及咱的神相及干證咱做上帝的子；17 既然做子就做後嗣，就是做上帝的後嗣，及基督同做後嗣。咱若及伊同受苦，是欲互咱及伊同榮光。

共同經課-4 約翰福音三章一節～十七節

1 有一個法利賽人，名尼哥底某，是猶太人的官。2 暝時來就近耶穌，對伊講：「拉比，阮知你做先生是對上帝來的；因為若姆是上帝及伊佇啲，就無人會行你所行諸個神蹟。」3 耶穌應伊講：「我實實給你講，人若無重頭生，就袂會看見上帝的國。」4 尼哥底某對伊講：「人已經老，怎樣會重頭生？豈會閣入老母的腹肚來生嗎？」5 耶穌應講：「我實實給你講，人若無對水對聖神來生，就袂會入上帝的國。6 對肉體生的是肉體；對神生的是神。7 我講：『恁的確著重頭生』，你莫得掠做奇怪。8 風出在意思來吹，你聽見伊的聲，姆知伊對叨落來，叨落去；見若對神生的，亦是按呢。」9 尼哥底某應伊講：「怎樣會按呢啊？」10 耶穌應伊講：「你做以色列的先生，也姆知這嗎？11 我實實給你講，阮是講阮所知的；干證阮所看見的；若是恁姆接納阮的干證。12 我給恁講地上的事，恁尙且姆信，若給恁講天頂的事，恁豈欲信？13 無人曾上天，只有佇天裡的人子，對天降落的若定。14 閣親像摩西舉起蛇佇曠野，人子亦的確著按呢受舉起，15 互見若信的人惦佇伊有永活。16 「因為上帝將獨生的子賞賜世間，互見若信伊的人，袂沈淪，會得著永活，伊疼世間到按呢。17 因為上帝差子入世間，姆是欲審判世間；是欲互世間對伊得著救。」